



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tir\_yimiyim



tir yimiyim

TAPAK 8



PM Modi-i lenir kar den West Asia tensa atema jembi



Lionel Messi ya goal 900 takaratiba idaktsüba asayar kumogo

VOL. XXIII ISSUE NO. 156 (ADOK 156) DIMAPUR ROGONÜ (FRIDAY) METSÜREMI (MARCH) 20, 2026

₹ 5.00

## ULB senotsü amshiyim nung temulung masür

**Dimapur, Metsüremi/March 19 (TYO):** Municipal councils nung mapa inyakterem ita aika itasen magütsü aruba osangtem temai adokba sülen grant-in-aid amshiba indang departmental inquiries asütsü Nagaland sorkari totuyuba agütsüogo.

Dimapur Municipal Council (DMC) aser Kohima Municipal Council (KMC) densema urban local bodies (ULBs) nung itasen tanen makai menua magütsüba mapang ka nung iba mera ya agir, ta Advisor, Urban Development and Municipal Affairs, Zhaleo Rio-i ashi.

Osangbener den jembidang, 2024 ULB elections magidang itasen magütsü bendena aliba agütsütsü atema sorkari DMC nem sen 5 crore dak tera tali aser KMC nem sen 3 crore dak tali agütsü, kechiaser councils anaprongi one-time assistance meshia liasü, ta Zhaleo-i ashi.

"Ita ishika tsüngta parnok ano kasa tebilemsü bener arur. Sorkari aji magüzükteter," ta pai ashi aser iba ama one-time grants

ya aiben magütsütsü ta ashi. Senotsü agütsüba meshidaki amshi asü ta asüngdangba mapang, tangbo kuli kecha mali saka department-i iba ken o tejangja asadangtsü, ta Rio-i langzü.

"Parnok inyaksangshi shidak masü ta shitetsü... DMC, KMC, MMC - parnoki takum meliteta, angka kar meshidak alitsü. Aser iba atema onoki süoki ia bilemer," ta pai ashi.

ULBs ya parnok sasa revenue yanglua iba den state teyari aser 15th Finance Commission kübok aliba densema central funds amshia takum alitsü imlar, ta ashi.

Jila kar nungbo revenue ajema lir, ajisüaka councils temi ochishia inyakra parnok sentü nung malitsüla, ta Advisor Zhaleo-i ashi. Dangar tem den medemdangra Mokokchung Municipal Council (MMC) ya tajungba lir ta pai ashi.

State nung ULBs 39 lir, aser senotsü kanga ajema lemsar, anungji terenlok maparen kanga ajema lir, ta pai ashi.

## Ao Senden-i Koridang by-poll atema senden ayonger

**Dimapur, Metsüremi/March 19 (TYO):** 28 Koridang Assembly Constituency nung by-election ochishia aser tesunep nung agütsü mechi Ao Senden-i shisadokden senden ka ayongzüka lir.

Iba senden ya March 21, 2026 anüngdang 11:00 ako nungi Ao Senden office, Mokokchung nung amentsü, kong constituency nungi village councils, ward ktdangsur aser stakeholders ajunga jaoka lir.

28 Koridang AC by-poll ya April 9 nü agütsü aser May 4 nü

vote azüngtsü ta Election Commission of India-i sangdongba sülen iba mera ya agir.

BJP nungi lenir tejen aser ponguben MLA inyaksang Imkong L Imchen asüba sülen iba menden tazüng akum.

Local bodies tsüngta amalitep akatsü, election inyakyim ochishia aser talenba makai inyaksü aser nübuyimba aser polling mapang sunepa alitsü nükjidong nung iba senden ya ayongzüker, ta Ao Senden-i ashi.

## CYO-i Maova yimtsüng nungi lenir asem atüngdoker

**Dimapur, Metsüremi/March 19 (TYO):** Maova yimtsüng nung alirtemi February 13, 2026 nü Chakhroma Public Organisation (CPO) tir aser pa den külemi inyaker dak teka sangshia volunteers tem kanga sashia yirutsüba dak sendakba nung Chakhroma Youth Organisation (CYO) ajanga Brehostibarnü sangdong ka agüja liasü.

Iba lendong timtem dak sendakba nung CYO-i item nisungtem anir arutsü aser Maova Village aser CPO tsüngta yimjung tangatettep kati arutsü takhangba agütsü.

Yamaji Maova Village-i mepishiba ama CPO-i iba ken o tajunglen nungi angatetteptsü asoshi Maova Village lenirtem den aiben maongka teperi agüja aru, saka tanü tashi Maova yimtsüng nung aliba lenirtemi CPO den tangatettep kati arutsü memerang, ta CYO sangdong ajanga ashi.

Angami Customary Law and Tradition nung aliba ama aser Tsiepama Village nung April 15, 1945 küm Chakhroma standing

resolution Point No. 04 nung "Chakhroma züngsem dak teka sangshir shinga Chakhroma area nung alitsü memelatsü" ta lemteta aliba ama aser Medziphema Town nung July 31, 1995 nü pangzüng renema aliba ama Maova village Chairman, GB aser Ex-Chairman, parnoki par lanurtem ajungmesoa CPO lenirtem aser CYO volunteers dak jelia tasa yanglur amaknung aser tangatettep kati marunung, Chairman, Maova Village Council, Sutminal Vaiphei; Seiboi Changsan, Head GB aser Paoboi Changsan Ex-Chairman, Chakhroma jurisdiction aser talisa Maova Village nungi atüngdoker, ta CYO sangdong ajanga ashi.

Par asem ya iba totuyuba agütsür anogo 30 tsüngta Chakhroma jurisdiction nungi ainshitsü metetdaksür, ta ashi.

Tashi mangai Chakhroma Area nungi züngzüksüba mapang nung mainshi, tarutsü nung parnoki timtem ajurura, par khuret asütsü, ta CYO sangdong ajangasa ashi.

## 28 Koridang by-election: Asür Imkong L Imchen'er jabaso nem BJP ticket agütsüogo



28 Koridang Assembly Constituency by-election nung tokteptsü asoshi Daochier I. Imchen nem BJP party ticket agütsüogo. Iba ticket agütsüba sentong nung state ktdangsur, PDA alliance partners, NFP indang district president aser ktdangsur, BJP district president den party karyakartas aser temulungertem dena liasü.

**Dimapur, Metsüremi/March 19 (TYO):** Ajaki meteta aliba yimden yimsüsür kibong ka nungi tejak tasen ka 28 Koridang by-election nung tokteptsü, kechiaser Brehostibarnü BJP-i iba constituency by-election nung par candidate ama tokteptsü Daochier I Imchen shimogo aser kasa mapang linük tesem balala nung constituencies pezü atema nominees tenüng sangdonga liasü.

Goa, Karnataka, Nagaland aser Tripura nung Assembly menden pongu atema by-polls ya April 9 nü agütsü lir.

Iba telemtetba ya party indang Central Election Committee senden ka March 18, 2026 nü amenba mapang agia liasü, koba BJP national president Nitin Nabin menden süer agi aser Ato Kilonser Narendra Modi, Defence Minister Rajnath Singh aser Home Minister Amit Shah nunger dena liasü.

Nagaland nung BJP-i 28 Koridang Assembly Constituency asoshi Daochier I Imchen shimogo.

Pa ya yimten yimsüsür tejen asür Imkong L Imchen'er jabaso tanubosang lir. Asür Imkong ya

ponguben tashi legislator inyaker aser taoba mapang advisor inyaka alidang November 2025 nung asü.

Daochier ya July 25, 1990 nung aso aser Political Science nung MA renemer lir aser 2023 küm BJP nung züngsema liasü. Yimten yimsüsüba tsütsü taoba mapang pai tebu den yaritepa arua liasü.

Imkong L Imchen asüba sülen Koridang nung by-election agütsüsa akum. BJP-i par jabaso tokteptsütsü mera agiba ya par kibong bhukumer soita ayutsü aser constituency nung maneni tsüngnep lidaktsütsü merangba ka ama ajiteter.

Kasa anogo danga state tem asoshi BJP-i candidates tenüng sangdongba nung Ponda, Goa asoshi Ritesh Ravi Naik; Dharmanagar, Tripura asoshi Jahar Chakraborti; Bagalkot, Karnataka asoshi Veerabhadrayya Charantimath aser Davanagere South, Karnataka asoshi Srinivas T Dasakariyappa alitsü.

Central Election Committee ajanga recommendations agütsüba nung ajemdaker item nisungtem ya shim, ta BJP national secretary Arun Singh-i ashi.

Daochier I Imchen-ia party lenirtemi pa dak tamang akaba asoshi pelaba lemsatop aser party lenir aser workers teyari nung April 9 by-election nung tokteptsü yongya atar ta ashi.

## Dimapur Police-i Assam len kumdanga senzütsü metetdaksür

**Dimapur, Metsüremi/March 19 (TYO):** Election dak sendakba tenokdangba balala indang memetetba yong senzüsemponger temi timtem ajuruba osang balala lir, ta ashi.

Dimapur Police ajanga nüburtem dang kuli tejangja makai senotsü talitabong bener mesenzütsü ayongzüker kechiaser kuli tejangja makai senotsü tali bener jajartem ktdangsur temi aputsü, asüngdangyatsü mesüra senotsü meshia ayutsü, ta ashi.

Senzüsemponger tem dang hon, taribi mesüra jenang tulu aketba osot atema documentation shidak bener senzütsü metetdaksü.

Temelaba shidak makai pamphlets mesüra posters

Election dak sendakba tenokdangba balala indang memetetba yong senzüsemponger temi timtem ajuruba osang balala lir, ta ashi.

Dimapur Police ajanga nüburtem dang kuli tejangja makai senotsü talitabong bener mesenzütsü ayongzüker kechiaser kuli tejangja makai senotsü tali bener jajartem ktdangsur temi aputsü, asüngdangyatsü mesüra senotsü meshia ayutsü, ta ashi.

Senzüsemponger tem dang hon, taribi mesüra jenang tulu aketba osot atema documentation shidak bener senzütsü metetdaksü.

Temelaba shidak makai pamphlets mesüra posters

densema political materials kecha bener mesenzütsüla, kechiaser item osot bener jajaba nung timtem ajurutsü akok, ta ashi.

Iba den ano tesem balala nung gari tem kanga junga meita aor, anungji senzüsemponger temi ktdangsurtem den amalitep akatsü aser mapang ajak nung identity proof tejangja aser nüngdakba documents bener senzütsüla, ta ashi.

Licences tejangja mesüra temelaba shidak makai prangbong aser injang bener senzütsü khenyongi memelar, ta Dimapur Police ajangasa metetdaksü.

## General Observer-i Mokokchung nung ktdangsur den senden amen

**Dimapur, Metsüremi/March 19 (TYO):** Mokokchung district kübok 28 Koridang Assembly Constituency nung Bye Election agütsü aliba atema Election General Observer, Dr. Neeraj Shukla, IAS-i March 19, 2026 nü Deputy Commissioner, Mokokchung indang Conference Hall nung District Administrative Officer, Returning Officer, Asst Returning Officer, Sector

Magistrates, Sector Commanders, Police Officials, Magistrates of all Flying Squad Team, Asst Expenditure Observer & Accounting Team, Control Room Nodal Officer, Media Monitoring Team, Video Surveillance Team aser Video Viewing Team den senden ka mena liasü.

Iba senden nung General Observer-i tensa ajunga

asadanga Bye Election atema renemshiba reprangshima liasü.

Election tiptema agütsü atema district nung electioneering machinery amenoka aliba indang Deputy Commissioner & District Election Officer Mokokchung, Ajit Kumar Verma, IAS-i rateta ashi aser Sr. SP, Vesupra Kezo, NPS-i security inyakyim indang lemsatepa liasü.

## Nagaland Forest Officers Conference agiogo



March 19 nü Rhododendron Hall, Police Complex, Chumoukedima nung Nagaland Forest Officers Conference aliba mapang alakteta jaoker Minister for Environment, Forest & Climate Change and Village Guards C. L. John-i o jembiba mapang tangokba noksa nung angur.

**Dimapur, Metsüremi/March 19 (TYO):** Nagaland Forest Officers Conference March 19 nü Rhododendron Hall, Police Complex, Chumoukedima nung agiogo. Iba sentong nung state kübok tesem balala nungi forest ketdangsürtem adenshia arem ketdangsüba aser aremshiruru aser tzu mopung wazüka ayutsüba amala tongtibang onüktem benoka sensaksemogo.

Conference nung Minister for Environment, Forest & Climate Change and Village Guards C. L. John alakteta jaoker liasü aser sentong ya Vedpal Singh, Principal Chief Conservator of Forest & Head of Forest Force lenisüba nung agi, shibai lokti pela agizükba o jembiba liasü.

Sentong nung o jembiba mapang C. L. John-i, tzu mopung wazüka ayutsü atema sorkar bendanga agütsür aliba, aser arem aser tzu mopung melenshiba kümzüka ayutsü asoshi lenmang tasen bushitsü nungdakba lemsatepa liasü. Paisa, nisung aser shiti tsüngda mangatetep aliba, shikariba aser arem wazüka ayutsü nungdakba amala tongtibang onüktem

benok aser Longleng o Bhandari amala tesemtem nung shiti aser nisung tsüngda aiben timtem adokba ya longjemer inyaksü aser tangazükba agütsütsü aser iba ya nokdangtsü asoshi tasatem nungdakba lemsatepa liasü.

John-isa süngtolitong tali atemtsü atema jenjang agitsü ayongzük. Tzümpung temenenba küma aoba dak sendakba nung pai arem arungba yimya ya toktsütsü ayongzükba den nürurtem aser ketdangsür ajak dang khuret angatetta inyaksü mepeshi.

Sentong nungsa Principal Secretary, Environment, Forest & Climate Change, Fisheries & Aquatic Resources and Parliamentary Affairs Y. Kikheto Sema-i, state nung arem kanga junga ketdangsüa aotsü atema longjemer inyaksü, sentong tapet yanglutsü aser institutional mechanism tem akangshitsü nungdakba lemsatepa liasü.

Paisa, 1963 küm State Forest Department amenokba sülen tang mezüngbuba Forest Officers' Conference agir aser iba ajanga ketdangsür tejentem, policy yanglurtem aser osangbenertem ajak tang

tzümpung dak sendakba nung tayongzükba balala aliba aser tarutsü nung arem ketdang asütsü asoshi sensaksemtsü longjemdaktsüogo, ta ashi.

Conference mapang state nung tetsükdaktsü balala ajangshiba aser talisa ali dak sendakba ken o kanga tebenja aliba indang sensak asem, kechiyong department-i arem ya shilem 5 dak tajemba dang azüoka lir. Item talenbatem liaka ketdangsürtem dang item arem tanüker aser sepaitem ama inyaksangshitsü ayongzükba liasü.

Sentong nung tongtibangsa arem ketdangsüba, biodiversity wazüka ayutsü, ali aser tzu kümzüka ayutsü aser data dak ajemdaker telemtetba agitsü atema GIS amala tanü asüng amshiba hadirtem amshitsü nungdakba sensaksema liasü.

Maneni sentong nungsa arem ketdang asütsü atema lokti-i shilem agitsü nungdakba Compensatory Afforestation Fund Management and Planning Authority (CAMPA) fund ken o, süngya lu ayimtsü lenmang sadema lapoka aliba amala onüktem sensaksema liasü.

## Dimapur nung Mega Job Fair ka ayonger

**Dimapur, Metsüremi/March 19 (TYO):** Nagaland Skill & Entrepreneurship Development Mission (NSEDMD), Investment Development Authority of Nagaland (IDAN) aser NIELIT, Kohima, Government of India na longjemer March 21 nü Integrated Business Hub and Innovation Centre (IBH&IC),

Forest Colony, Dimapur nung State-Wide Mega Job Fair ka ayongzükba agitsü.

Mega Job Fair lapokba sentong ya 9:30 nungi tenzüka agitsü.

Sentong nung Nagaland Chief Secretary, Sentiyanger Imchen, IAS tetushi tejaoker asütsü, ta kasa sangdong ajanga metetdaktsü.

## DC & DEO, Mokokchung-i metetdaktsür

**Dimapur, Metsüremi/March 19 (TYO):** Deputy Commissioner & District Election Officer, Mokokchung, Ajit Kumar Verma, IAS-i sangdong ka ajanga, Election Commission of India-i 28-Koridang Assembly Constituency Bye-Election kecha tebandang makai sadem sadema yimjung nung agitsü atema observer tem shimtsüba metetdaktsüogo.

Iba Bye-Election atema observer ji Dr. Niraj Shukla, IAS, General Observer

(Contact No. 9862966114) aser D. Sreedhar Reddy, IRS, Expenditure Observer (Contact No. 9612797996) asütsü.

Observer temi political party balala, election nung toktepba candidate aser nürurtem den tebilemstü balala, ken o mejangjai aliba jangjashitsü aser tashishiba benoktsü atema Commissioner indang Guest House nung anepdang 10 ako nungi 11 ako tashi mapang agütsütsü, ta kasa sangdong ajanga metetdaktsüogo.

## LPG aser POL teperi lir: Chumoukedima DC

**Dimapur, Metsüremi/March 19 (TYO):** Chumoukedima Deputy Commissioner Polan John, NCS-i sangdong ka ajanga nürurtem dang district kübok outlet ajak nung LPG aser POL (Petroleum, Oil & Lubricants) osettem teperi lir ta metetdaktsüogo.

DC-isa, aritepa alitsü mesüra miima bendena ayutsü asoshi kecha nungdak madoker, kechiyong District Administration-i Oil Marketing Companies aser distributor tem den stock tem asadanga alitsü atema maneni sendaktepa arudar, ta ashi.



Kasa mapang DC-i, nürurtem dang olulu osang prokshibatem ajakbo mamangtsü atema mepeshia metetdaktsüogo.

Maneni DC-i nisung mesüra telok kari danga ozüng alema LPG aser POL product tem miima yur ayokba ngutetra temzüng ozüng tapet dak ajemdaker merenshitsü ta metetdaktsüogo.

## Inclusive Education & Psychological Well-Being Workshop agi



MCTE nung Shisalen sayur den Principal aser workshop nung shilem agirtem tangokba noksa nung angur.

**Dimapur, Metsüremi/March 19 (TYO):** Department of Higher Education, Nagaland-i sponsore süa Inclusive Education & Psychological Well-Being dak sendakba nung anogo ana atema workshop ka Mokokchung College of Teacher Education (MCTE) nung March 18 aser 19 nü agiogo.

Iba sentong nung educator, tesayur kaketshirtem, practitioner aser Inclusive School tem nungi tesayurtemi

shilem agi, koba tanur dak rangloker aliba tesayuba inyakyimtem dak rangloker agia liasü.

Sentong ya Dr. T. Alemla Longkumer, Principal, MCTE-i lokti pela agizükba ojembia tenzük, shiba shisalen sayur Special Educator aser Bumblebee Inclusive School and Society, Kohima ngutetla Kopele V. Tapa, aser Themmungla Raman Longkumer, The Cloud Room (Counselling and Psychological

Assessment Centre), Kohima ngutetla Themmungla Raman Longkumer na metetpela liasü.

Mezüngbuba anogo session tem disability balala aser tangazükertem nungdakba balala dak rangloker agi. Tapa-i, disability ya academic lens nungi dang magitsüla ta shia tesayurtem dang parnok ariabilema amshiba nungi pilar parnoka züngoksema shilem agidaktsütsü ajungshia liasü.

Inyakyim tapu balala dak amendaker aliba demonstration

asir lokti exercise balala ajanga sentong nung shilem agirtemi shitemang tekelok shisatsü agi tangar memenepi alirtem züngoksema aser züngtokba indang angazük aser iba ajanga item nisungtemi lokti nung tetsüdaktsü balala ajangshibatem tali tajungba angateta liasü.

Laisa, item tanurtem ya classroom adena or loktilibaren, Arogo aser anogoshi libaliro nung züngoksemsü nungdakba lemsatep. Laisa, tsürapurtemi tetsüdaktsü balala ajangshiba indang lemsatep. Ajak dang tongtibangsa lai tanurtem ya shisaluyim nung takok asoshi dang masü saka tangar dak memetaloki alitsü atema renemtsütsü kodang tongtibang iba indang jembiba liasü.

Tanabuba session nung Raman Longkumer-i, "Every Child, a Story in Progress," onük nung ajemdaker jembiba aser lai tesayurtem dang parnok matamabensaba dak merangloki tangazükter ajak ya

agizüktsü ajungshi.

Inyakyim balala ajanga sentong nung shilem agirtemi labelling aser mashiyimi medemdangba ajanga tanurtem dak kongshiba indang tangazükba agütsü.

Tanübuba ya tangatetba tem classroom inyakyim kümdaktsütsüba dak rangloker agi. Raman Longkumer-i tanurtem kanga junga asadanga atatsü koda tongtibang iba indang lemsatepba den tesayurtem dang kaketshir ka yimya yimpong atema telangzüba magütsü tsüngda khen atasatsü ajungshi.

Tatembangbuba session nung Tapa-i, tangazükba yimya balala inyakyim ka ajanga sayua tenzüka liasü. Lai Universal Design for Learning (UDL) indang tangazükba agütsüba den visual, tactile, aser auditory method tem amshitsü ajungshi.

Workshop mapang shilem agirtemi theory angazükba dang masü saka practical tasatema aika angazükogo.



March 19, 2026 nü New Delhi nung Tata Group Chairman, Natarajan Chandrasekaran-i 'Knight Commander of Most Excellent Order of the British Empire (KBE)' agizükba sülen tangokba noksa nung angur. Kasa noksa nung British High Commissioner to India Lindy Cameron den tangartem angur.

### India nung küm 5 ser tekübok tanurtem süadokba ajema kümogo: UN

**New Delhi, March 19 (Agencies):** Tesüiba küm 30 tsüingda India nung arrshi küm 5 ser tekübok tanurtem asüba kanga ajema kümdaktsüogo, ajisüaka kinü tanurtem kanga bulua asüba ya tebilemtsü onük ka lir, ta United Nations Inter-agency Group for Child Mortality Estimation Report 2025 ajanga metetdaksü.

2024 küm tashi nungbo tanur 1,000 shia nung tanur 27 dang asü; 2000 küm nungi tenzüka iba rate ji shilem 92 aliba nungi shilem 26.6 tashi ajema kümogo. "Tanur asüdag süadokba ajema kümdaktsüba tsütsü India ya alima nung tatishitsü tajung aliba linük ka kümogo. 1990 küm nungi tenzüka kinü asüdag süadokba shilem 70 agi tajemba kümogo aser arrshi küm 5 ser tekübok tanurtem süadokba shilem 79 agi tajemba

kümogo," ta Union health minister, Jagat Prasad Nadda-i X ajanga metetdaksü. Ajisüaka kinü tanur sozükli asüba ajema kümdaktsüababo kanga anü-anür; 2000 küm kinü tanur 1000 shia nungi 43.8 asüba nungi 2024 küm tashi nung kinü tanur 1,000 shia nungi 16.7 asü, aser ibaji shilem 62 dang ajema akümba lir. India nung küm shia arrshi küm 5 ser tekübok tanur lakh 5.4 shi asür, aser iba nungjagi lakh 3.9 bo kinü tanurtem asüba lir.

### Election nung ozüing alema inyakba khenyongi magizüktettsü: CEC

**New Delhi, March 19 (Agencies):** States aser UTs pongu nung assembly election agitsü mapang ana nung lia Brihostibarnü Chief Election Commissioner, Gyanesh Kumar-i election mapang nung ozüing alema inyakba mapatem aser amokmerenba khenyongi magizüktettsü, ta metetdaksüogo. Talisa pai ketdangsertem aser police officers dang party shinga pu-mesemi inyaktsü,

ochishia inyaktsü aser ozüing alema inyakbatem nokdangtsü metetdaksü. "Raraba, voters amokmerenba mesüra mesüzükbaji Election Commission-i khenyongi magizüktettsü," ta Chief Election Commissioner-i election agitsü aliba state pezü aser UT ka nung ketdangsertem nem metetdaksü. Election Commission-i West Bengal, Tamil Nadu, Kerala aser

Assam nung ketdangsertem tasen aika shimogo. "West Bengal ama state tem nung election mapang nung raratepba aser amokmerenba kanga bulua ataloker. Iba ama inyakyim ya anentsüla," ta election ketdangser kati metetdaksü. Iba dak sendakba nung mita reprangtsü atema Observers 1,111 lemezütsüogo, ta election commission nung tongti ketdangser kati metetdaksü.

### PM Modi-i lenir kar den West Asia tensa atema jemb

**New Delhi, Metsüremi/ March 19 (Agencies):** Brihostibarnü Ato kilonser Narendra Modi-i France Tir Emmanuel Macron, Oman Sultan Haitham bin Tariq aser Malaysia Ato kilonser, Anwar Ibrahim nung phone ajanga West Asia tensa atema jembio. Narendra Modi-i item linüktem nung tongti lenirtem den West India nung tensa süngjemtsü aser yimjung alitsü atema jembio. Ato kilonser Modi-isa Strait of Hormuz nung khu abenba rongtem tetsükdaktsü kecha makai sademsadema senzütettsü atema lenirtem den o lemtepa liasü.

amalitepa inyaktsü bangjemogo," ta metetdaksü. Modi-isa, "Kü adianu Sultan Haitham bin Tariq den jembio aser jelia Oman nung nüburtem den Eid salem lemsatepogo," ta metetdaksü. Paisa, "Rara süngjemtsü, yimjung aser tesünep alitsü atema ken o jembitsüji kanga tongtibang, ta onoki bangjemogo," ta metetdaksü. Ibrahim den jembidang Modi-i Hari Raya Aidilfitri benjung salem lemsatep. "Künati West Asia tensa atema tebilemtsü akaba lemsatep aser ken o jembiba ajanga tekeraba nung yimjung alitsü atema inyaktsü bangjemogo," ta pai metetdaksü.

Tesülen Modi-i X ajanga, "Kü medemer Tir Emmanuel Macron den West Asia tensa atema jembio aser rara anentsü nungdak ta jembio. Iba dak alia region nung tensa süngjemtsü atema ken o jembitsü nungdak ta jembio. Iba region nung yimjung aser tesünep alitsü atema maneni

Taküm February 28 nü US aser Israel nati senteper Iran amakba sülen tang agi tanabenbuba Modi-i Oman Sultan den jembio. Iba rara tenzüka sülen Modi-i Saudi Arabia, Bahrain, UAE, Jordan, Israel aser Iran linüktem nung tongti lenirtem den-a jembio.



West Bengal nung assembly election agitsü mapang ana nung lia March 19, 2026 nü Kolkata nung BJP candidate, Swapan Dasgupta-i Rashbehari Assembly constituency kübok local market ka sema nüboyim dang tangokba noksa nung angur.

### Rajya Sabha nung MP tem 32% anemabo ken o benoka lir: ADR

**New Delhi, March 19 (Agencies):** Tang Rajya Sabha nung MP tem shilem 32 anemabo ozüing alema inyakba ken otem benoka lir aser MP tem teimbaka billionaires lir, ta Association for Democratic Reforms (ADR) indang report ka ajanga metetdaksü.

tepsetba ken o benoka lir, MP pezü anema nisung tepsettsü merangba ken o benoka lir aser MP asem anema tetsür anema inyakba ken o benoka lir. Party tem sasep nung, BJP MP 99 nungi MP 27 anema ken o benoka lir, Congress MP 28 nungi MP 12 anema ken o benoka lir, TMC MP 13 nungi pezü anema ken o benoka lir aser AAP MP 10 nungi pezü anema ken o benoka lir. CPI(M) MP asem aser BRS MP asem anema ken o benoka lir.

Tang Rajya Sabha nung teinyakdak MP 32-ibo parnok anema ken o benoka aliba metetdaksüogo aser MP tem shilem 14 bo billionaires lir, ta Association for Democratic Reforms (ADR)-i metetdaksü. Iba report ya Rajya Sabha nung MP 233 nungi MP 229 indang election affidavits nung ajemdaker renema liasü. Tang Jharkhand state nung MP menden kabo tazüing lir aser MP asem indang affidavits bo mengutet. Iba report nung tang tasenpur MP 37 indang osang densema lir. MP 229 nungjagi MP 73 (shilem 32)-i parnok anema ken o benoka aliba metetdaksü aser MP 36 (shilem 16) anemabo ozüing alema inyakba ken o tamajung benoka lir. MP ka anema nisung

Kasa report ajanga ashiba agi, Rajya Sabha nung MP 31 (shilem 14) ket nungbo sen billion aika lir. BJP MP trok billionaires lir, Congress MP pongu, YSRCP MP pezü, AAP MP ana aser BRS MP ana billionaires lir. NCP MP asem ket nung sen crore 100 dak tali lir. Ano külen MP tem rongnung sensaktibaji AAP MP Sant Balbir Singh lir. Pa ket nung sen lakh 3 jenjang rongsen lir; Manipur nungi Maharaja Sanajaoba Leishemba ket nung sen lakh 5 aser TMC MP Prakash Chik Baraik ket nung sen lakh 9 jenjang rongsen lir.

### Vikram Doraiswami, India Ambassador to China shim

**New Delhi, March 19 (Agencies):** Vikram K Doraiswami India's next Ambassador to People's Republic of China shimogo, ta Brihostibarnü ministry of external affairs (MEA)-i metetdaksü. Doraiswami ya 1992-batch

Indian Foreign Service officer lir aser tang pa ya India's High Commissioner to United Kingdom teinyakdak. Kobi melii pai mapa tasenba agizüksü, ta MEA-i metetdaksü. India aser China nati linük ana tsüingda tesendaktep

tajungba akümtsü atema maneni tongtepratepa inyakba mapang ka nung Doraiswami ambassador shimmer. Tamalen Doraiswami-i menden balala nung tenzüka aruogo aser foreign service tsütsü pa ya takutet ketdangser ka lir.



March 19, 2026 nü Lucknow nung Samajwadi Party Chhatra Sabha züngsemtemi LPG cylinder agi anüingba anema Vidhan Bhavan kima longkak aitba noksa nung angur.



## TIR YIMYIM YIMOBILEM (EDITRIAL)

DIMAPUR FRIDAY, FEBRUARY (METSUREMI) 20, 2026

### Terenlok India

- *Tangsen Lemtur*

**T**esüiba küm ishika Ato kilonser Narendra Modi- i anir Union Minister temi kanga bulua jembia aruba oren kaji 'Viksit Bharat' lir. Tangbo sentong balala nung mongintem aser shisashirtemia Viksit Bharat indang jembia arur. Tang tesüsa yakünüba (March 15) Mysuru nung sentong ka nung jembidang Consortium for Educational Communication (CEC) director, Prof. Parikshat Singh Manhas-ia Viksit Bharat nükjidong ataloktsü atema alima tensa mapang den apet shisaliok jenjang asüngsashitsü atema jembio. Viksit Bharat tetezü 'Terenlok India' lir. 1947 küm India nung nuchiso anguba sülen 2047 nung küm 100 ajungtsü, anungji nuchiso ngur küm 100 ajungba küm tashi nungjibo India ya 'terenlok linük' ka akümstsü nükjidong yur sorkari asalentong balala benoka inyakdar. Iba mangdang yur sorkari budget-a renemer. India nung nuchiso anguba sülen taküm 79 abensatsü, ajisüaka tesüiba küm 78 tsungda India nung sensak tia tamajungba dang akümba ya tebilemstsü onük tuluka lir. India nung takartembo takarba dang akümer saka sensakertembo tesensakba dang akümer. India nung rongsen shilem 77 bo nütsung shilem 10 ket nung lir; iba report ajanga takar ishika ket nung linük rongsen shilem tulubaka aliba kuli jangjar. Iba dak sendakba nung Oxfam India campaign ajanga sorkar dang nüburtem taküm jenjang tajungba akümstsü atema sen teimba indoktsü aser takartem dang nungi saru tali agitsü ajungshir. Sorkari 2047 küm tashi nungbo 'Terenlok India' nükjidong ataloktsü mangdang yur inyakbaji junger, ajisüaka iba mangdang yur inyakba denji külemi 2047 küm tashi nungjibo nütsung million aika 'sensak tia' aser 'aya-tzüra' tia nungi anitettsü atema-a mangdang yur inyaktsüla. Asenokibo aikati kangasa sensaka aliba jenjangji majangshidang saka linük nung nütsung aika kanga sensak tia nung lir. Tamalen UNICEF report ka ajanga ashiba agi, India nung anogo shia nisung crore 20 bo aonung bokzüng mejanger. India nung nuchiso ngur küm 100 ajungtsü atema rangloker jajaba kümtemji 'Amrit Kaal' asüstsü ta sorkar sangdonger inyangshia arudar. 'Amrit Kaal' tetezü sensotem taküm jenjang tajungba kümdaktsütsü, yimtsung aser jila tsungda terenlok tsütsü liromedemtsü, nüburtem libaliro nung sorkari kangabo mamoshitsü aser technology tajungtiba asüstsü. India nung nuchiso ngur küm 100 ajungdangbo India nung aya-tzüra agi asürtem melira ibajisa takok tulutiba asüstsü. Yaküm küm tatembanglen sangdongba Global Hunger Index 2025 nung linük 123 nungi India jenjang 102buba nung ang lir. UN Food & Agriculture Organization-i, India nung million 189 bo (nütsung shilem 14) bok agi matu, ta metetdaktsüogo ajisüaka iba dang nungjagi teimba alitsüa akok. India yimtsungtem nung nütsung shilem 70 shibo aluyimba nung metaloka lir, anungji sensak tia agientsü atema yimtenren lenirtemi jila/yimtitem terenlok atema rangloker inyakba dang nungjibo yimtsungtem aser aluyimba sector nung taliba rangloker inyaktsüla ta mongintemibo ashir. UN-i yawara tetezü yamai rateter- chiyungtsü makaba agi anogo shia nisung 10,000 shia nungi tain anana mesüra tanur pezübo yaseta asüba aser tanur asem shia nungi kabo bok agi matu kongraba tensaji yawara lir. Ajioda India nungbo yawara meliaka anogo shia nisung 7,000 yaseta asür (UNICEF Report). UN Sustainable Development Goals-i 2030 küm tashi nungbo alima nung aya-tzüra malitsü nükjidong yur inyaker; yamaji India-ia 'Viksit Bharat' nükjidong yur inyakba denji külemi linük sasep nung aya-tzüra malitsü nükjidong yur inyaktsüla.

## OLEMSABANG

### WORLD ORAL HEALTH DAY

- Dr. N.MOANGANGBA JAMIR, Jt. Director (Dental)& SNO-NOHP  
Directorate of Health and Family Welfare

World Oral Health Day anogo ya temang rangben anema alitsüba tsütsü Tebang(Oral Cavity)koda tongtipang iba indang shisa lemsatepa alima ajunga nung kümshi 20th March anogo nung World Dental Federation ajanga ayongzüka sentong palala yanglua 2013 nungi munga arur. Iba anogo nung Health Organisation palalai angati tepang aser tepu tashidaktem anepalua yariba den külemi shisatokden pei linük dak apet arok Omen ka nung ajemdaker sentongtem palala yanglua amonger. Taküm Omenji "A Happy mouth is a Happy Life" ta yimyim ayimokja kodang tepang, temeli, tawa, aser tepu nung komolongra adoka chiyungtsü achitsü, aser jembishinütsü mesademi timtima kangshidir iba jagi memeteti asen temang rangben nung timtim agüja, tekolok shisatsü tashi mesüngjemteti anema melitetba dang masü, taküm ka jangratema pela-a meliteti pei mapa nunga süli, lokti mapa nunga süli, tebilemba ama shilem magiteti, atsungzüksütsüsa akümba tebilemstsütem asadanga, yamala timtim nungi koda jenbua alitsü(Prevention) item indang shisalen sayua teyari lenmang palala nungdakba nüburtem nüm teyari agüja iba anogo ya amonger. Alima ajung den külemi Nagaland nunga Doctors aser Health Workers temi aja-ayanga taküm Omen nung ajemdaker Educational Institution aser lokti tentet palala nung shisalen sayua, tetoktepa palala ayongzüka, ano nungdakba patients tem anepalua yaria amongtsüba sentong lir.

Asen tebang ya temang rangben atema süngküm ka amai lir(Gateway of the Body) Saka ano tang tashi aikati tebang ya tepu 32 indang ya dang ta bilemer aser tepu agi tashi agi ngua(Severe tooth ache)mekangshi tashi züpazüpa dang toktsür. Kodang tepang nung tepu lokshia aoba nungi tenzüker tashidak ka agi danga timtimtir chiyungtsü sadema mechitettsü, O sadema mejempitettsü, tejak teprangtsü tamajungba akümstsü, oda oda temang shilem palala nung tashimait tenzüksü. Tepu arba(Dental Caries) bangshinem menemba, tepunü tshimait küma azü ayimba, aser temeli aser tawa nung komolongra palalatem mapang shidak nung anepalu mesüi toktsüba ajanga temlounjang tashidak(Heart Disease) tepokpok tashidak palala(Respiratory Disease) Shinü tashidak(Diabetes Mellitus) mela mela adoktsü akok. Ano tetsütem mashisa alidang tepu/tebang tashidaktem ajanga anojungi tanur jetzüka tsükba(Miscarriage) tashi ataloktsü akok. Palaka tanü asung Sali moko achiba ajanga Tebang Süngra(Oral Cancer) kanga pulua adoker taoba küm pungu tsungda nung Naga nung Oral Cancer adoka shiranger parnok 440 tashi puteta tesem palala nung yaria arudaki, tesasatsüka parnok ishika Operation/Chemotherapy/Radiotherapy agia arishi tatsüka aliyunga, timba ka taneptsü mungi kanga kangshia akümüli tempangogo. Tipkelen tanü asung palaka tanurtem mamayungbo(Primary Teeth) mesen agi er-a chiyungtsü mechitetba dang masü, tejak tebang waka, amoa-a moteti timtimba aika kümdaki. Ya ajak tanang chiyungtsütem, amtsük amlong telatet makai achiba aser tepu mapang shidak nung memeyuba ajanga adoker. Yangibo tetsü kati tongtipang shilem agitsüba lir kechiasür tanur atema tetsü kaji mezüngbuba tesayur, aser kechisarenaji kibong nungi shidak tenzüksüla.

*(Maneni asung adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## YouTube nung Bible lesson upload asüba atema pastor ka apu



Pastor Rolando Pérez Lora aser pa kinüngtsü na noksa nung angur.

**March 19, 2026:** Cuba nung Protestant pastor kati YouTube nung Bible lesson upload sütsüba atema police-i apu.

Pastor Rolando Pérez Lora-i Peñas Altas, Matanzas nung aliba Park ka nung iba video ji upload asüba sülen mapang tatsüka tsüngda police-i pa apu.

Pastor Pérez Lora-i mapang shia pa indang YouTube channel nung upload asütsü atema video tangoktsü asoshi iba park jagi oa liasü.

March 15, 2026 nü police Pastor Pérez Lora apu.

Chiyungtsü aser mozü agi anüngba anema tang Cuba nung nüburtemi longkak sashia aiter aser tesem-tesem nung rara adoker.

March 14 nüa longkak

aitertemi Moron yimti nung ruling Communist Party indang office aika rongdokja liasü.

Iba tatalokba sülen anogo ka lir police-i Pastor Pérez Lora gari ka nung puoka anir ao.

Pai police dang, "Kuli kecha makai nenoki kü dak tim mesüi benshir. Ni kecha aibelen masü," ta metetdaksü.

Ghonda ishika lir pa chiokba sülen osangbenertem den jembidang pai, sorkari mapang shia ozü ministry anema inyaktü meranger, ta metetdaksü.

"Anüdoklen [Cuba] onok kanga reshikangshir. Ni nisung ajak tenzüksü jangrar, ni akokba tashi tangartem den lemsateper aser mapang teimbaka ni kü kijai inyaker. Ni mapa tajung

inyakbaji ketdangsertemibo mejungi repranger," ta pai ashi.

Paisa, "Las Tunas nung State Security-i ni aiben jaokogo, amokmerenogo aser ozü kidangi police aiben yokogo.

Onok sarasadema jajadang mesüra jilai sarasademsü aoba mapang nung police-i onok anishia liasü. Iba ama otsü aika lir," ta metetdaksü.

Pastor Perez apuba aija Christian Solidarity Worldwide (CSW) director of Advocacy, Anna Lee Stangl-i, "Pai (pastor Pérez Lora) yimjak nung osangtajung lemsatepba atema pa anema inyaker. Pa apuba sülen ghonda ishika tsüngda chiokba osang angashia onok pelar, ajisüaka mezünyonggi pa maputsüla liasü," ta ashi.

## Bangladesh nung Khristan lenirtemi sorkar dak teimla akar

**March 19, 2026:** Bangladesh nung Khristan lenirtemi sorkar tasenba kübok tamangba yimsü temeden jenjang tajungba akümtsü, ta teimla akar.

Bangladesh Nationalist Party-i general election nung takok tulu anguba aser Ato kilonser menden atema Tarique Rahman shimba sülen Khristan lenirtem aikati sorkar tasenba dak teimla akaba lemsatepogo.

Ato kilonser tenangzükbaba agiba sülen anogo pongu lir Rahman-i cabinet senden ka ayongzükbaba; iba senden nungji yimsü balala nung lenirtem nem ita shia senotsü teyari agütsütsü aser benjung mapang nunga senotsü teyari agütsütsü telemtetba agi.

Muslim nungner nütsüng teimba aliba linük, Bangladesh puti otsü nung tang mezüng Muslim nungner dang masü saka tanga yimsü lenirtem nem-a senotsü teyari agütsütsü atema telemtetba agiogo.

Dhaka nung aliba archdiocese nung vicar general, Rev. Albert Rozario-i, "Ni sorkar nem tenüngsang agütsür. Iba linük junga yimsütsü aser tesünep alitsü atema Arogoi sorkari atema sarasademsütsü," ta

metetdaksü.

Bangladesh nung Clergy & Religious Commission of the Catholic Bishops' Conference

Chairman, Sebastian Tudubibo, "Catholic Arogoi senotsü teyariji magitsü. Catholic lenirtem ya itasen angurtem masü saka parnoki Tsüngrem nem pei taküm bendanga agütsür tenzüker, anungji sorkari ita shia agütsüba senotsü teyariji onoki magitsü," ta metetdaksü.

"Tarutsü nung sorkar nungi mesüra yimtenren tsütsülen nungi terongshiba kar alitsüa akok, mesüra parnoki onok amshitsü merangtsüa akok, anungji onoki senotsü teyariji magitsü," ta paisa metetdaksü.

Bangladesh nung Khristan nütsüng 500,000 shi lir. Iba linük nung tesüiba ita 18 tashi yimtenren tensa mejungi aliba sülen tang sorkar tasen akümer.

Taküm February 12 nü agiba election nung Rahman-i aniba party-i two-thirds majority agi takok ngua liasü, iba sülen February 17 nü sorkar tenangzükbaba agiogo.

Osangbener den jembidang Bangladesh Assemblies of God nung chairman, Rev. Asa Michael Kain-i, election osang

ya tamangertemi sarasademba Tsüngremi langzüba lir, ta ashi.

Rev. Asa-i, "Election osang ya Arogo sarasadem Tsüngremi langzüba lir. Tang tensa mejungi aliba ajanga Arogoi kanga sarasadema liasü. Tsüngremi asen sarasadem langzüogoo aser Ato kilonser tasen shimogo," ta metetdaksü.

Election osang sangdongba sülen Catholic Bishops' Conference of Bangladesh, United Forum of Churches Bangladesh aser Bangladesh Christian Association densema Khristan organization aikati BNP nem tenüngsang agütsüogoo.

Parnokisa sorkar tasenba dang sensotem nem security agüjang aser nütsüng ajema alirtem nem-a kasa temeden agüjang, ta takhangba agütsüogoo.

Bangladesh Hindu Buddhist Christian Unity Council-i ashiba agi, 2024 küm August ita nungi 2025 küm November ita tashi nung Bangladesh nung minorities anema inyakba tatalokba 2,673 liasü; item tatalokba rongnung tepsetba, tashiyim amshia raksatsüba aser tekülem kitem raksatsüba densema lir.

## ANOGO ABEN TSÜNGREM DEN

### Tongpang rara mesüra tazüokba?

*Kechiaser Kibubai shiba dang meimer pa merenshir aser Pai agizükba techir ajak dak azüker. Ibri 12:6.*

Khristan shia jangratemtsü masüba mapatem atalokba ajaki tanelaren tongpang rara ama bilemer. Kodang timtem ka atalokdir, idangjisa iba timtem agentsü aikati Tsüngrem dang asüngdang. Parnok timtem tebilemstüji Satan mesüra tanelaren kechi prok aji arur (Gal. 6:7) ta agizükdang nungibo Satani asenok amaker ta agizübaji tali tamarenba lir.

Temeim Tebui arütsübaji Satani merenshir ta aibilena angatetsü akok. Nai tanelaren tesayur ka ama tanur dang mesayura, Tsüngremi parnok temenen nung tsükdaktsütsü akok. Na tenzükbaba nung ochi meshira na melenshitsü asoshi iba nungi adokbaji nai agidaktsütsü akok. Ne mulung masüba temulung süa kümdakjang ta sarasademtsübaji tamashi asütsü. Nai temulung agütsütsü aser ne taküm nung nungdak temelenshi adokdaktsütsü asoshi Tsüngremi na azüoker. Ne tebilemstütem Tsüngremi azüokba den sendaktepa melira koda lendong. Tsüngrem azüokba Satan mapa aser tanelaren tongpang rara ka ama agizükra Tsüngremer tazüokbai kodanga meyaritettsü. Nai ajuruba timtem ajakji Tsüngremer tazüokba masü, saka Tsüngremi na azüoker ta Laishibai sayur.

Tsüngremi arütsüba nai mangatetra Tsüngremi ne sarasadem melangzür aser Satan nungi kümzüksü makoker ta nai tenüng asentsü akok. Saka nai temenen menabayong timtem ajurur ta Tsüngremi ne nem tekümdangtsü agütsür. Ne taküm nung timtem mapang ajurur asü? Ibaji Tsüngrem tazüokba asü? Tsüngrem, shiba temeim nung tabensa lir, Pai tatem nung tajung agütsütsü Pa mulung nung alinung Pai na metongshitsür.

## Middle East nung tamangertem anepalutsüsa nübo peria mali

**March 19, 2026:** Middle East Khristan lenirtemi, middle east nung nisung meyrjang aikati Khrista agizüker, ajisüaka tamanger tasenpurtem tanela o agi mesütsü aser anepalutsü atema nübo peria mali, ta metetdaksü.

Middle East nung Khristan lenirtemi, iba region nung rara ajanga nisung jenti jenshiba, sorkartem tashi maitba aser alima tensa tamajungba akümba mapang nung nisung meyrjang aikati tanela jenjang bushir, ta metetdaksü.

Middle East nung talisa rara ajanga tesem balala nung jenshia alirtemi Khristan yimsü indang metettsü kanga jangrar aser aikati Khrista agizüker, ta parnoki metetdaksü.

Ajisüaka tamangertem tanela chiyungtsü agi mesütsü atema nübo peria mali, ta parnoki metetdaksü.

Khristan lenir kati, tang tensa ajanga aikati Khrista

metettsü jangrar, alima tensa tamajungba akümba mapang nung Tsüngremi mapa inyakdar, ta metetdaksü.

Middle East nung nisung meyrjang aikati Khrista agizüker, ajisüaka parnok nem pastoral care agütsütsü aser tanela nung indaktsütsü atema nübo peria mali.

Ano linük kar nungbo Muslim yimsü toktsür Khristan yimsü agizükertemi sadoksadoka Tenla kidangi mouteter, ibayongji parnoki house churches nung adener aser online ajanga Bible studies agir, ta Khristan lenirtemisa metetdaksü.

CMS-i, "Middle East nung tamanger tasenpurtem anitettsü atema Khristan organisation ajaki longjemer inyaktüsüa kümogoo. Alu jenti menzüka lir anungji asenoki lenmang tasen bushiteta inyaktüsü. Tanü Esther, Yoseph aser Daniel nungner ama nübo aika nungdaker," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Wako

(n) nisan (flag)

\* Naga nunger wako nung tongnusen keta lir.

Wakong

(n) sentsü tenenya (yellow)

\* Wakong sentsü alidak ayimba tzüji tajemtsü majung.

OLONG PAITEP # 7449

Grid for OLONG PAITEP # 7449 with numbers 1-18 in various cells.

TIPIEN

- 1. Inyaker ajangletba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S \_\_\_\_ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. \_\_\_ hi - (3)
16. Akümüli nungi pilar - (3)

OLONG PAITEP # 7448 TELANGZÜBA

TIPIEN :

- 1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER



England nunger rongnungi international football asaya nung goal timtiba idaktsür alisang Harry Kane-i Bodhbarnü otsü tasen ka yanglua pa ya UEFA Champions League nung goal 50 idaktsüba England nunger asayar mezüngbuba kümogo. Bayern Munich puri UEFA Champions League nung Atalanta goal 4-1 agi akokba asaya nung pai goal idakja iba alizüng tongteta liasü.

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Manipur nung telungpur telok balala nungi züngsem trok apu



Imphal, Metsüremi/March 19 (Agencies): Tawa grenade amshia ki ka amakba sülen Manipur nung security force temi telungpurtem anema meita aoba sentong balala ayongzuka agiba mapang taoba ghonda 48 tsüngda telungpur telok balala nung tetsür ka densema nisung trok puogo.

State Water Resources Department Chief Engineer Yumkhaibam Homendro'er kidang bomb pokdaktsüba sülen telungpurtem anema jenjang tali agi tenzükogo. Police-i ashiba agi, telungpur telok ka nungi züngsemtemi Mongolbar aonung 9 ako meta Imphal West district nung Nambol police station kübok Malom Tuliyaime nung par kidang hand grenade ka

mereplokja pokdaktsü. Iba bomb yagi par kishi tera raksatsü, saka lendong nung nisung asüba osangbo kecha mali.

Iba sülen security forces temi district kübok tesem balala meita ao tenzük. Meita aoba mapang sepaitemi injang ana, Honda Activa ka, tashishitsü aketba kuli kakettem aser SIM card densema mobile phone trok nguteta liasü.

Imphal East district nung Kangleipak Communist Party-People's War Group (KCP-PWG) nung züngsem asem tesem balala nung apu. Sepaitemi pua alirtem ya Moirangthem Jiten Singh 46), Mutum Ranjan Singh 46), aser Thokchom Devarani Devi 43) ta jangjaogo.

Kasa mapang nung tanga meita aoba sentong ka nung People's Revolutionary Party of Kangleipak (PREPAK) nungi züngsem ana; Thoudam Jingko Singh 25) aser Taorem Arunkumar Singh 32) na Imphal West districts kübok Thoubal nung pua liasü.

Maneni tanga meita aoba sentong ka nung security personnel temi People's Liberation Army (PLA) züngsem Elangbam Abinash, Kakching district nung Sugnu police station kübok Singtom tesem nung apu.

Police-i ashiba agi, parnok pua alirtem den parnok ket nungi ngutetba osettsütem police station tapettem nem bendanga agütsüogo.

Assam BJP-i candidate 88 tenüng sangdongogo

Guwahati, Metsüremi/March 19 (Agencies): Bharatiya Janata Party (BJP)-i 2026 Assam Legislative Assembly elections atema candidate tem mezüngbuba list sangdongogo.

Iba osang ya centre nung party lenirtemi sandong, kong urban centre tem, tribal tem aliba tesemtem aser yimden yimsüsüba tsütsü mepetmesü nung aliba district tem nungi mendentem densema lir. Chief Minister Himanta Biswa Sarma Jalukbari nung maneni tokteptsü, koba BJP pur tamendakdak takang ta züngshir.

Lenir tejentem aser minister tem aika maneni shimogo, kong Chandramohan Patowary (Tihu), Ranjeet Kumar Dass (Bhowanipur-Sorbhog), aser Pijush Hazarika (Jagiroad) nunger densema lir.

Kasa mapang nung BJP-isa inyakyim metongshia tang MLA tinyakdak aliba parnok 15 nem ticket magütsü, kong Cabinet



Minister ka densema lir.

Iba temeleshi agi kongshiba constituency tem rongnung Bihpuria, Bijni, Hojai, Katigorah, Silchar, Abhayapuri, Guwahati Central, Dispur, Palashbari, Udarbond, Haflong nunger densema lir, kong party-i candidate tasen yoktsü telemtetba agiogo.

Temelenshi tulutiba rongnung kaji Guwahati Central-Dispur segment nung BJP-i sitting MLA ka melena tawa Congress nungi meyipsang Pradyut Bordoloi nem ticket agütsüogo. Haflong

MLA aser Cabinet Minister Nandita Garlosa meshimba ajanga party-i lenir tejen repranger masü saka akoktsüpurtem shimer ta angateter.

Katigorah, Silchar aser Hojai densema Barak Valley amala tesemtem nung temelenshi ajanga party inyakyim arangtetshitsü merangba sayur, kong kanga sashia tokteptsü imlar.

Party-isa, Lower, Central, aser Upper Assam nung Palasbari, Rangia, Dispur, Guwahati Central, Mangaldai, Nagaon, Lakhimpur, Dhemaji, aser Tinsukia amala constituency atema candidate sangdongogo.

Süngolu nung tribal tem timba aliba constituency tem nung lenir tejen aika shimogo aser iba den candidate tasena aniokogo. Tamulpur (ST), Dudhnaï (ST), aser Dhemaji (ST) nunger nung party tem tsüngda kanga sashia tokteptsü imlar.

Mizoram: AMC election April 21 nü agitsü

Aizawl, Metsüremi/March 19 (Agencies): Aizawl Municipal Corporation (AMC) election April 21 nü agitsü, ta State Election Commission (SEC)-i Bodhbarnü sangdong ka ajanga metetdaktsüogo. AMC election ya menden 19 atema agitsü.

Aizawl nung osangbenertem den sensaksemba mapang State Election Commissioner H. Lalthlangliana-i ashiba agi, election ya ward 19 nung anepdang 7 ako nungi tenzuka nikongtsütsü 5 ako tashi agitsü. Minprong kar danga adoker election ya April 27 nü

agishitsü aser vote tem April 27 nü azüngtsü.

Election nung tokteptsü atema nomination paper file asütsü asoshi tatebangbuba anogoji March 25 asütsü. Nomination tem ya March 27 nü asadangshitsü aser candidate temi March 30 nü tashi nung atsüngintettsü.

Municipal body indang term March 1 nü tembangogo, saka tanga tongtibang inyakyimtem kar adokba ajanga SEC-i election agitsüba thinenja liasü.

Election magitsü tsüngda yimden yimsüsüba tsütsü inyakyimtem tali kümogo.

Opposition Mizo National Front (MNF)-i candidate tem list ajanga sangdongogo aser Congress-ia menden 19 nungi 13 atema candidate sangdongogo. Ruling Zoram People's Movement (ZPM) puri March 23 nü tashi nung candidate tem sangdongtsü imlar.

SEC data ajanga ward 19 nung voter lakh 2.39 lir, kong tetsür voter lakh 1.26 shi lir.

2021 küm February ita taoba AMC elections agiba mapang MNF-i menden 11 akok aser ZPM-i menden trok aser congress-i menden ana koka liasü.

# Qatar energy infrastructure amakba sülen toztü jenjang timba akumer

**London, Metsüremi/March 19 (Agencies):** Qatar nung gas facility tongtiba densema Middle East nung energy infrastructure nung asendenshir amakba sülen toztü aser gas jenjang timba kumogo. UK aser Europe nung aliba wholesale markets nung gas jenjang shilem 25 agi tali akum aser tatsüka lir tera ajema liasü.

Europe nung gas jenjang ya US aser Israel nati Iran den rara tenzükdang aliba nungi anasü dak tali agi timba kumogo.

Totzüa yamaji jenjang timba nung ayoker aser Brehostibarnep khenbo Brent crude ya shilem 10 tali kuma barrel nung sen \$119 jungnüa agi yoka liasü aser mapang tatsüka lir sen \$114 akum.

UK gas jenjang ya tang shilem 25 shi agi timba kumer 175p per therm nung lir.

Brehostibar nikongdang Iran indang South Pars gas facility - alima nung natural gas fields tulutiba - amakba sülen jenjang timba akumba alitsü.

Iran-i tayang kepzüka Qatar nung aliba liquefied natural gas export facility tuluka maka teraksa tulu bener arutsü aser alima nung energy supply tsütsü tebilemsü akar.

Israel-i South Pars gas field nung Iran indang petrochemical complex amak ta osang sangdongba sülen Ras Laffan

nungya maka liasü. Tang tesüsa osang yagi stock markets anokshitsü, kechiaser mapang talangka raraba ajanga rongsenketzüng nung kongshitsü ta investors tem tebilemsü tali akumer.

Brehostibarnep Japan nung Nikkei share index ya shilem 3.4 nung liasü aser London nung FTSE 100 ya shilem 1.8 agi ajema liasü.

Ajisüaka Russia-i Ukraine amakba sülen toztü jenjang atuba amabo masü ta ashir.

Iran indang mitkari par energy infrastructure nung amakba langzüa mera tesashi agitsü ta tekumdangtsü shia lir.

"Taoba mapang tekumdangtsü shia aliba ama, American-Zionist tsükchir temi ozü linük indang toztü, energy, gas aser economic infrastructures makra, tsükchir anema meyipier sashi-sashia amakba den külemi tashiyim amshirtem poktetba tesem nunga amaktsü," ta mitkari sangdong ka agütsüba Tasnim news agency nung sangdong, koba Islamic Revolutionary Guard Corps den sendaktepa lir.

"Countries of origin indang toztü, energy aser gas infrastructure nung akok tashi tekeratiba nung amaktsü."

Gas field nung Qatar-ia facilities kar ketdang asür, koba dang parnok North Dome ta ajar.

Ajisüaka rara mechi March

ita tetenzüklen nungi parnok production anena lir, shirnoki alima nung liquefied natural gas shilem pongu lemsaba nung shilem ka yanglur.

South Pars gas field amakba sülen Iran-i tenük yoktsü akok ta tenüing bendenba nung Ras Laffan ya liasü.

Totzü jenjang timba akumba nung telangzüba agüja Bodhbarnü White House-i Jones Act agiena atar ta ashi, koba 1920 nung yangluba ozüing ka lir aser yangji US rongnendak tsüingta osettsüset belenba nung America-i yangluba rong tem kisüing amshitsü shia lir.

Iba ozüing anogo 60 atema agienba ajanga toztü, natural gas, fertilizer aser mijang ama tongtipang ali rongsentem America nungeri meyangluba rong tem amshia belentetsü, ta US Press Secretary Karoline Leavitt-i ashi.

Ajisüaka US nung maritime groups temi iba yagi kongshiba kangabo malitsü, kechiaser pump nung jenjang timba akumba ya rong yangluba jenjang agi masü toztü jenjang agi lir ta ashir.

Kasa mapang Iran-i linük telungzüc nung amshitsü atema Iraq nem agütsüba gas soitogo ta Iraq ketdangtsü kati ashi.

Iran indang gas supply shilem 94 tashi par linük nung amshir, ta Gas Exporting Countries Forum ajanga ashir.

## ONOKI TETI MEIMA ALIBA MOALILA



05.08.1974 - 20.03.2025

"Kechiyong asenok takum lira, asenok Kibuba atema takum alir, aser asenok süra, asenok Kibuba meyong." (Rom 14.8)

Na oaka, nai kechi atema nokdak, ibaji onok den teti alitsü.

~Temeim Kinungbo & Jabasotem

## UNGMA IMPANG SALONG SEMCHIR UNGMA, MOKOKCHUNG TENÜNGSANG AGÜTSÜR

Ungma Impang Salong Semchir nungi Nagaland State kübok twa adokba NPSC(CTSE) 2025 nung **Sb. Nungmeren Jamir**, Mr.N.Sutsung Jamir aser Mrs.Tiamenla Longkumtsur na jabaso, pai Pharmacist Health and Family welfare Department kübok takok anguba aser **Kr. Salukumla**, Mr.Imlitemjen Jamir aser Mrs.Kumsangmongla Longkumtsur na jala, lai Gold Medalist in Master of Science (Chemistry) Nagaland University kübok takok konang tulu bener arutsüba asoshi asen Impang Salong Semchir ajaki pelaba lemsateper.

Asen Impang Salong Semchir-i nenok taküm aser inyakba wadang ajak nung tajung Tsüingremi moaja len aniang ta aji onok sarasadem.

Sd/- **A.MATSUNGSHIBA JAMIR, TATAR** Sd/- **B.KILEPCHIBA JAMIR, TATAR**

## Indonesia: Activist ka acid agi amakba ken o nung military officer 4 puogo

**Jakarta, Metsüremi/March 19 (Agencies):** Indonesia military ketdangtsürtemi ashiba agi, parnok activist ka acid agi amakba ken o nung densema alitsü ta bilemba ketdangtsür pezü puogo. Iba activist ya nüburtem libaliro nung military shilem tali küma aoba anema nokdangba atema nüngtugu lir. KontraS rights group indang deputy coordinator Andrie Yunus ya March 12 nü mejangjaba nisung kari motorcycle ka nung mener arua acid agi amakba sülen pa tejak aser temang shilem 20 rongsa liasü.

Item nisungtem ya military kübok intelligence unit indang züngsemtem laisü, ta Indonesian Armed Forces Military Police Commander Major General Yusri Nuryanto-i ashiba den parnok ya Navy aser Air Force nungia liasü ta shisem.

"Onoki temulung melemi bilemer parnok pezü military police headquarters nung sota yua lir aser bushisüingdang südar," ta pai osangbenertem dang ashi.

Tir Prabowo Subianto-i 2024 küm election koka office mapa agizükba sülen rights

telok aser kaketshirtemi, pa indang policy tem benoktsü atema military tashi amshiba ashishia arudar aser iba ajanga taoba küm August ita linük ajunga nung mepetmesü adoka liasü.

Activist sang ya Indonesia politics nung military tashi tali küma aoba indang podcast episode ka mangaokba sülen maka liasü.

Yusri-i ashiba agi, ketdangtsürtemi item nisungtem yagi kechiba pa ya amak aji jangjatsü atema bushisüingdang tenzükogo, kong parnok nem temaba jenjang nung aliba ketdangtsürtemi tetuyuba agütsü magütsü jangjatsü atema ken o asadangba densema alir.

Pai aija alirtem tenüing mesangdong aser parnok indang rank dang metetdakja liasü.

Jakarta Police Chief Asep Edi Suheri-ia, activist ka amakba ken o nung temulung melemi bilemer pezü apuba jangjatsüogo.

Danga police ketdangtsür, Iman Imanuddin-i ashiba agi, ken o nung tangara densema alitsü akok.

## Yipru tesashi agi Karachi nung nisung 15 takum samatsü



**Karachi, Metsüremi/March 19 (Agencies):** Bodhbhar aonung Pakistan nung yimti tulutiba nung tzüinglu tesashi aser mopung tashi tulu arua tesem balala nung jara aser kilem chirepba nung nisung 15 asü aser aika yiru, ta emergency services aser mozüki ketdangtsür temi Brehostibarnü ashi.

Pakistan south tsütsü Sindh province yimtiba Karachi nung yipru ya Bodhbarnü tenzüc aser aonung tashi maneni aru. Ketdangtsür temi iba yimti nung alirtem dang menüingdakba

nung senzüsemping masütsü metetdaksü.

Nisung tasüming 15 shi yimti nung mozüki tuluba bushia bener aru. Tzüingsang-mopung dak sendakba lendong balala atalokba sülen nisung 20 dak tema yiru aser mozüki balala nung anepalua liasü, ta police surgeon Summaiya Tariq aser emergency ke6tdangtsür temi ashi.

Yipru yagi lenmang anasa aliba süngdong tera makepa laodaktsü aser traffic nung timtem ajurua liasü ta ashi.

Ghonda ishika mopung ya 90

kph (56 mph) ona liasü ta Pakistan Meteorological Department-i ashi. Karachi Mayor Murtaza Wahab-i nüburtem dang kilung alitsü aser menüingdakba nung senzüsemping masütsü tayongzücba agütsü aser süngdong tem laotsü akok aser ketdangtsür temi lenmang müreksü inyaktar ta shia liasü.

Ano maneni tzüinglu aser yipru den mopung tesashi agi Karachi aser Sindh province nung tesem balala amshitsü ta tzüingsang-mopung takzür temi ashi.

# Mon nung Inter Departmental asayamung tenzükogo



**Dimapur, Metsüremi/March 19 (TYO):** Officers' Club Mon (OCM)-i ayongzüka 12buba Inter Departmental asayamung Officers' Club Mon aser Neilkeak Futsal, Tammong nung tenzükogo.

Asayamung ya March 19 nü tenzükogo aser March 21 nü tashi asayatsü.

Asayamung lapokba sentong nung Deputy Commissioner Mon, Wennyei Konyak, NCS alakteta jaoker liasü.

Asayamung lapokba sentong nung o jembiba mapang Deputy Commissioner-i, asayamung ya takok angutsü atema dang masü saka iba ya sendaktepba mapang ka lir ta ashi. Iba amala sentongtem

ajanga tesendaktep tajungba kümdaktsür aser sensaksemsü aser kati ka tajungba metetteptsü asoshi maongka agütsür, ta pai ashi.

Asenok anogoshia official mapa balala aser nüburtem tenzükba mapa nung nokdaker aliba mapang anisüngzüksü aser tekelok shisatsü asüngsashitsü atema amatoker ta shia DC-i, lanur ketdangsurtem dang club inyakyim nung takok tashi shilem agitsü aser club-i agütsüba facility tem takok tashi amshitsü ajungshi.

Iba sülen Mon Deputy Commissioner, Wennyei Konyak, NCS-i asayamung ya lapokja liasü.

Sentong nungsa ADC Mon,

Pakon Phom, NCS-i ketdangsa asayartem tenangzüktepba agi. Iba sentong ya Wangkhao Govt. College Asst. Professor Manyei Kuhmeishu N lenisüba nung agia liasü.

Maneni sentong nung Associate Pastor, Chingai Fellowship Pumin Konyak-i Tsüngrem temaotsü meshizüka sarasadem, T. Yanlem DWO, Mon-i lokti pela agizükba o jembi aser H. Samuel Konyak-i ken tajung ka atenba den Mary aser lar medemertemi special performance ka süa liasü.

Taküm iba asayamung nung Mon district kübok department balala nung ketdangsurtem asaya balala nung shilem agidar.

# 2026 FIFA World Cup masayatsü Iran tebilemba mali

**Metsüremi/March 19, 2026 (Agencies):** Iran-i World Cup dak sendakba nung parnok tamendakdak jangjashitsüogo aser ashiba agi, parnok 2026 FIFA World Cup nungibo matsüingintsü, saka parnoki United States bo boycott asütsü.

Iran FA tir Mehdi Taj-i parnok tamendakdak jangjashitsüogo aser parnoki asayamung masü saka US boycott asür ta shiogo.

"Onoki America boycott asütsü, saka World Cup bo boycott masütsü," ta pai ashi.

2026 FIFA World Cup ya June 11 nungi July 19 tashi U.S., Mexico, aser Canada nung asayatsü lir aser group-stage nung Iran asaya asemprongla United States nung asayatsü lir.

Ajisüaka February tatemlen nungi Tehran aser Washington na raratep tenzükba sülen Iran-i parnok asaya ya co-host Mexico-i belener aotsü atema merangdar.

Mexico tir Claudia Sheinbaum-i, Iran team asayatem par linük nung ayongzüka asayatsü mulunga aliba lemsatepogo. Ajisüaka tatembangbuba telemtetba ya FIFA-i agitsü, shirnoki mapanglem memelenshitsü ta shiogo.

Asayartem taküm lendong nung lir ta shia Iran-i asayaba tesem melenshitsü asoshi

merangdar.

Kasa mapang nung U.S. tir Donald Trump-i, Iran team US nung arua asayatsü menokdangtsü saka asayartem taküm lendong nung aliba apir parnok maru tajungba asütsü ta ashiba ajanga ken o tebenjaba kümdaktsüogo.

Iran Sports Minister Ahmad Donyamali-i, tang tia tensa apir parnok shilem agitsüji khenyongi tamakoktsü ta ashiba den US ya ozüng alema inyaksangshiba sorkar ka ta ashi.

Item olen balala ya amshia Taj-i Iran team asayatsüba tesem melenshitsü asoshi nongshia arudar.

Team World Cup nung asayatsü masayatsü mejangjaka Iran team maneni renemdar.

National team tang Turkey nung training camp ka agidar aser parnok Nigeria aser Costa Rica den Antalya nung friendly asaya ana asayatsü lir, koba mezüngbo Jordan nung asayatsü liasü saka rara adoker aliba ajanga belenogo.

Tang tashi nung FIFA-a parnok tamendakdak nungi masetshi-i lir aser iba ajanga Iran team jenjang tamajung ka nung toktsüogo. Parnok qualify süogo, renemdar aser asayatsü mulungteter lir, saka US nung oa asayatsü memulunger.

# Lionel Messi ya goal 900 takaratiba idaktsüba asayar kümogo



**Metsüremi/March 19, 2026 (Agencies):** Lionel Messi-i pa indang career nung alizüng tasen ka tongteta pa ya Bodhbarnü tebur football asayartem rongnung official asaya nung goal 900 idaktsüba asaya tanabuba kümogo.

CONCACAF Champions Cup tanabuba leg nung Inter Miami CF aser Nashville SC na goal kaka agütsür tembangba asaya nung Messi-i goal ka idakja iba alizüng tongteta liasü.

Asaya tenzükker mapang tatsüka tsüngda Mess-i par

team atema goal ka ya idaktsü, saka parnok away goals rule dak ajemdaker iba tetoktepba nungi tsükogo. Nashville atema goal ka ya Cristian Espinoza-i idakja liasü.

Ajisüaka iba goal ya Messi asoshi alizüng tasen ka tongtetba liasü, aser tebur football asayartem rongnung Cristiano Ronaldo sülenbo pai dang official goal 900 idaktsür lir.

Ronaldo-i iba alizüng ya 2024 küm September ita tongteter liasü aser pai goal 965 idakja ajak dang goal timba idaktsür lir.

Portugal nunger asayar yagi pa goal 1000 idaktsüba mezüngbuba asayar akümsü tejangraba aliba lemsatepogo.

Ajisüaka Mess-i Ronaldo dang nungi asaya ishiba nung goal 900 ya idaktsüogo. Pai asaya 1,142 nung iba alizüng tongtetogo, koba Ronaldo-i asaya 1,236 nung tongteta liasü. Goal timtiba idaktsüba asayartem rongnung Pele tasembuba jenjang nung lir. Pai goal 765 idaktsüogo. Kasa mapang nung tang asaya aliba asayartem rongnung Robert Lewandowski-ia goal 690 idaktsür lir.

Messi-i goal ya timba FC Barcelona nungi asayaba mapang idakja liasü. 2004 küm nungi asaya tenzükba sülen pai Barca atema goal 672 idaktsü. Iba sülen pa Paris Saint-Germain nung oa asaya aser idakji goal 32 idaktsü. Maneni pai United States nung Inter Miami nungi goal 81 idaktsüogo.

International asaya nung Argentina national football team captain yagi goal 115 idaktsür lir. Pa asoshi ajak dang tajungtiba asayaba kümji 2012 küm liasü. Iba küm pai club aser linük atema goal 91 idaktsü, koba football asaya nung otsü tasen ka lir aser shingaia tang tashi nung ajangzükteta mali.

# Champions League: Barcelona, Liverpool quarter-i iogo

**Metsüremi/March 18, 2026 (Agencies):** Bodhbarnü Camp Nou nung Barcelona aser Newcastle United na asaya Barc-i goal 7-2 agi koka parnok Champions League quarter-finals-i iogo. Barcelona-i iba asaya ya aggregate nung 8-3 agi koka liasü.

Asaya nung mezüngbuba goal ya Raphinha-i minute trokbuba nung idaktsü, ajisüaka mapang tatsüka dang lir Newcastle atema Anthony Elanga-i goal ka idakja kasasa aküm. Marc Bernal-i Barca asoshi tanabuba goal idakja parnok maneni tejakdang aküm, saka minute 28buba nung ano Elanga-i par team atema tanabuba goal idakja goal kasasa aküm.

Asayamung mezüngbuba shilem atemtsü lia Kieran Trippier-i box nung Raphinha alangdaktsüba VAR-i ngutetba sülen Yamal-i penalty ka metsüa goal idaktsür asaya mezüngbuba shilem tembang.

Iba sülen Barc asoshi ano Fermin-i goal pezübuba aser Robert Lewandowski-ia goal ana idaktsü. Maneni minute 73buba nung Raphinha-i par team asoshi goal tenetbuba idakja parnoki asaya akok.

Parnok quarterfinal nung Atletico Madrid den asayatsü

shirnoki Bodhbarnü London nung Tottenham Hotspur 3-2 agi mekokaka aggregate nung 7-5 agi koka liasü.

Atletico puri taoba hopta mezüngbuba leg asayaba mapang goal 5-2 agi Tottenham pur koker liasü

Tanga asaya ka nung Liverpool puri Anfield nung goal 4-0 agi Galatasaray koka parnoki iba asaya aggregate nung 4-1 agi kokogo aser parnok quarter-finals-i iogo.

Galatasaray puri Premier League champions ya tang asaya aliba season nung kidang aneben koker liasü, kong taoba hopta mezüngbuba leg nung goal 1-0 agi akokba densema lir.

Asaya nung mezüngbuba goal ya Liverpool atema Dominik Szoboszlai-i minute 25buba nung idaktsü. Iba sülen parnok goal ana agi tejakdang kümer lila saka Mohamed Salah-i metsüba penalty ka kümzüka liasü.

Asaya tanabuba shilem nung Ekitike, Ryan Gravenberch aser Salah nungeri goal kaka idakja parnoki asaya ayong ayonga kokogo. Quarterfinal nung parnok Paris ?St Germain den asayatsü, shirnoki Chelsea aggregate nung goal 8-2 agi kokogo.

**BILEMDANGANG**  
"Anema aliba dak nü jangradem ajak sendaka lir."